



Kasch lääbe ooni Rääge

Das käämti mir doch saumässig glääge,
 Soone scheen's Lääbe ooni Rääge,
 Ich fänd's drumm bsunderbaar gediige,
 Wenn ich der ganz Daag kennti an d Sunne liige,
 Scheen bruun brennt, mit Blootere an der Schnuure,
 Kumm ich am Änd bi de nätte Sozi als Asylant duure,
 Dernoo wird mir alles zaalt, ich muess nimm go schaffe,
 Ich hätti denne e Lääbe, wie bi de Schlaraffe.
 Au der Wessels hät am droggene Wätter syy Vergniege,
 Äär wurdi by de Tramschiine, nimmi uff d Schnuure fliege,
 Sogaare fir unseri Fasnacht wääri daas e riise Hit,
 Me bruchti denne die gschissene Blaschtigmäntel nit.
 Doch ooni Rääge ischs Läbe au e Saich,
 Die ganzi Landschaft wurdi doodurch blaiich,
 Alli Pflanze verräble und sind verdoort,
 Basel wird zumene Wieschti-Ort.
 Yyberaal hets Sand, nur bim Lysbüchel isch e Oase,
 Zwische Autibaan und de Keerichtabgaase,
 Im untere Glai Basel, und das wäär jo draagisch,
 Reede si statt Diirkisch nur no Araabisch,
 Beduine wuurde no Basel ko, in Schaare,
 Die leere uns Kameelwaage faare,
 Und zem Schutz vo iire Burka-Fraue
 Wänn die im Rhybett e hochi Muure baue,
 Der Bach fliesst nymme, isch vollschtändig drogge,
 Kasch gmietlig im Ryybett uff d Waggeschtai hogge,
 D Fisch schnappe no Luft, sinn am verregge,
 Unterem Käppelijoch kasch gääli Riebli stegge,
 Dermit der Fäärimaa no Aarbed het,
 Vermieted äär syne Gescht, e Elektro-Trottinett,
 D Schtadtgärtnerei liit au nit uff em Ranze,
 Si dien soffoort uff de Parkplätz Dattelpalme pflanze,
 Und macht der Rääge no lenger Pause,
 Mien amänd no d Baim de Hind nooche sause,
 S Wasser wird rationiert, me zaalt derfir e huffe,
 Drumm duet me ab soffoort nur no Warteck suffe.
 Aaber immene Basel ooni Ryy wänn mir nit syy,
 Drumm laade mir alli zur Wätter-Olympiade yy,
 Die Räägedänzer, Wätterschmegger und Scharlataane,
 Die zaubere schyynts mit iirem Firlefanzen der Rääge aane,
 Stolziere mit ärschte Gsichter in Baasel umme,
 Mir glaube dääne alles, mir sinn drumm die Dumme,
 Und dien die fyre, derbyy isch der Rääge vo sälber koo
 By unsererer Regierig, mache mir das jo scho lang esoo.